

四庫全書

集部

欽定四庫全書

江湖小集卷九十一

宋 陳起 編

張良臣雪牕小集

晚步南城下

冷雲堆屋晚仍春
惘惘人行陌上昏
飛去飛來沙上雁
去年洲渚舊蘆根

春詞

葺蘭無限楚時春
罨岸風平綠自熏
睡起畫簷雙語燕

梨花留得夜來雲

又

後主寒香復倚春
潘嬙梳洗最輕盈
南朝破後無詞客
燕子桃花古石城

芳草復芳草

芳草復芳草
有人孤倚樓
明月復明月
何處照離洲
相見渺無期
此恨詎相知
日暮天寒吹
屬玉蠻江豆蔻重
重綠

玉臺體

一寸春霏拂綺寮
蕙花江上雪初銷
傷心燕子重來地
無復人吹紫玉簫

主人流落委荒墳
燕子還來壞戟門
惟有桃花古時月
端端正正照啼痕

曉行

千山萬山星斗落
一聲兩聲鐘磬清
路入小橋和夢過
豆花深處草蟲鳴

陪天童覺禪師如城

風勒江雲雪未勻，夢寒不到碧梅春。
破帆又指蕪城近，漠漠平沙落雁頻。

賦

柳暗旗亭不忍看，臨江愁殺晉衣冠。
傷心明月揚州路，十里珠簾蕙草寒。

示長蘆仁禪師

叢叢竹雀鬧人家，農事春來漸有涯。
品字柴頭煨正暖，

不知風雪到梅花

別持上人

茂竹永和字浣花天寶詩清江入舟楫忍淚別僧持

梅市道中

連雨疎蓬不耐關脩眉如失更晴慳越王故國無人問
艇子穿花自往還

有懷山房

每憶山房話夜深機前無主亦無賓老兵未領西來意

斜倚屏風一欠伸

西湖晚歸

帖帖平湖印晚天
踏歌遊女錦相牽
鳳城半掩人爭路
猶有胡琴落後船

書情奉寄蔣弋陽公

五都一何綺
歌管政繁會
賸我友明月
援琴寫秋瀨
何言吳離後
一飽困藜稗
風雨墨如翳
欲往徒自礙
頽年去堂堂
白髮新種種
崎嶇造化久
敗屨常決踵
從來萬

里意不料來嶮恐鳴鶴畧九皋未羨來軒寵

留題吳興投老庵

白鷺悠悠去不還渚雲汀草一生閒暮年不入西州路
空倚梅花說住山

送人遊姑蘇

兒時吾亦寄君州細細聽君說舊遊處處綠波通酒巷
女郎多在採菱舟

雪後

雪花竹屋未全消寒雀稍頭眼
擘椒紙閣不烟梅自放
底能踏濕渡溪橋

九日書呂季慈室

上池入寺見承平影落南州迹
易陳手把黃花看新雁
風烟愁殺舊京人

感舊

三十六陂春水綠
四十九年人事非
揚子江頭永嘉後
吳儂蕩漿北人稀

山房惠猫

從來憐汝丈人烏端正街蟬雪不如江海歸來聲繞膝
定知分訴食無魚

過臨平

兒時曾憶此登臨細說窮途有迷征四十九年蘧伯玉
月明人靜過臨平

過西溪

罨畫層波蕙草荒冷雲客雁兩回皇梅花到得吹成雪

金匱要略卷九十一
盡是清愁不是香

贈英上人

之秦騰肯迎張祿踏越何曾用計然元鼎事看蛙勝負
大槐人與蟻相連

酒熟

濁醪初熟薦霜螯不擬寒山不廣騷清曉豆花籬下立
竹梢獨與月爭高

遣家書

家住鄱城小洞天
經年烹鯉尚茫然
幾回鵲喜無消息
吹殺燈花獨自眠

祝貓

江上孤篷雪壓時
每懷寒夜暖相依
從今休慣穿籬落
取次懷春屢不歸

偶題

誰家池館靜蕭蕭
斜倚朱門不敢敲
一段好春藏不盡
粉牆斜露杏花梢

萱草

雪色侵凌綠翦芽枝抽寒玉帶金葩北堂回首傷心處
却復令人恨此花

小破

小破燕支鈿早梅雪雲平澹越江遲青山歲夜行人少
鴨鴨羣飛淺草時

謝汪尚書見訪

黃葉聲中接錦韉添丁籬落怪相牽歸來賸欲從僧話

正掩楞伽曝背眠

夏夜

恰則黃昏雨便晴
青塘迤邐盡蛙鳴
月明已在芭蕉上
猶有殘簷點滴聲

平旦

平旦梅花破冷紅
越香何限水流東
陳年翠袖新年恨
盡在吹香笑語中

江湖小集卷九十一

欽定四庫全書

江湖小集卷九十二

宋 陳起 編

葛起耕檜庭吟稿

春懷

過了花朝日漸遲相將又是禁烟時
寒留柳葉淒迷處春在梨花寂寞枝
牛角橫書孤壯志鹿門採藥誤幽期
自憐白髮成何事說與啼鶯未必知

姑蘇懷古

闔廬城下水連天故國淒涼思惘然堤柳數行垂舞帶
砌苔幾疊暈歌鈿了無麋鹿遊臺下祇有鳬鷺戲水邊
往事如今銷歇盡斷霞殘照鎖寒烟

記夢

綺寮縹緲敞虛明鵲峙鸞停護碧城珠藥一枝春共瘦
玉環雙珮月同明曾題洛賦緘新意却拊湘絃寄遠情
十二闌干風細細覺來依約記棋聲

湖天霜曉

十里平湖浸曉光
玉鸞飛舞鏡中央
也知青女催梳掠
淡拂鉛華試靚妝

暮春雜興

畫闌目斷楚雲西
芳草連天客思迷
家在江南煙雨裏
落花時節杜鵑啼

紫樨纍纍綴碧桑
林塘雨過綠生香
荆扉晝掩蒼苔寂
留得芸籤伴日長

閉門花落又春深
白紵歌殘對晚斟
惆悵年來心緒惡

一庭烟草綠沉沉

蘭杜初芳湘水春
鷓鴣啼處草如茵
雙魚不寄衡臯信
空有燈花入夢頻

燕子聲中日正長
讀殘書卷亂堆牀
夢回却愛西牕寂
閒看松花帶夕陽

雨中夢故山

冥冥細雨濕江城
掩映書牕翳復明
倦客一杯愁頓減
故鄉千里夢初成
金華洞口羊驚起
石佛山頭鹿伴行

石佛故
里山名
何日東歸溪上路一犁春綠帶雲耕

疎櫺

寒意沁疎櫺閒堦草尚青市朝人自醉泉石我常醒桂
寫月標格蘭傳秋典型何妨為老伴相與兩忘形

初春感舊

又是春生杜若洲憑欄回首總關愁雲橫楚峽縈新夢
月泛吳波憶舊遊立馬醉題花外驛聞鶯笑倚柳邊樓
如今萬事經心懶祇合長歌擬四休

檄雪

銀闕書飛急羽忙
料應滕六奏虛皇
要將閭苑蓬壺水
幻作瓊林玉樹芳
風約雲邊停鶴馭
冰清月際舞霓裳
鳳簫莫品淒涼調
催老梅花枉斷腸

和蘆洲劉子泉秋懷

雨送秋歸雁帶霜
凝情無處寄詩狂
一庭莎草蛩吟老
萬里梅花鶴夢長
德誼可踰鍾鼎貴
聖賢不死簡編香
邇來世道添悲梗
不但摧車是太行

贈燕

鎮日雙棲向畫梁有時飛去為誰忙得泥趁暖添芹壘
掠水因風貼柳塘語重喚回芳草夢舞輕時罨落花香
五陵年少傷春恨書繫紅絲擬寄將

次子泉韻

一聲鶗鴂又春休風簸榆錢滿地流燕子不知花落盡
等閒飛過柳邊樓

月轉庭花玉一闌寶釵不卸待郎看丁香擬結相思夢

無奈東風作社寒

東歸

游倦歸來似長卿
敝廬事事費經營
掃除塵土虛堂潔
拂拭牕櫺舊紙明
徑菊已荒唯草長
井花少汲覺苔生
寒夜未辦西風急
不柰鄰家機杼鳴

除夕

爆竹傳聲又歲除
流年不駐隙中駒
屠蘇未用斟春酒
餽飫先教促曉厨
彩綯戶庭更鬱壘
歡傳院落競樗蒲

老來樂事關心懶吟對梅花撚斷鬚

秋寓都城次趙君瑞韻

催破橙香薦蟹黃快斟新酒潤詩腸雁拖暝色橫秋水
鴉帶寒聲噪夕陽萬事莫如花下醉百年渾似夢中狂
登高休負湖山約約買扁舟載艷粧

次劉野泉韻

自笑生隨雁影浮幾經楚尾與吳頭塞樓角送關山月
湘驛砧敲嶽麓秋歲月森輪如走坂功名求劔記行舟

即今安得如澠酒與汝同澆萬古愁

安分

淒烟澹靄鎖林扉又是秋光欲暮時蘋葉江湖風翦翦
桂花庭院雨絲絲世情冷暖杯中酒人事輸贏局上棋
安分得閒閒最好不須身外強尋思

覽鏡

覽鏡羞看鬢點霜若云勲業更堪傷已甘身向山中老
安得名留海內香雅志擬聯高士傳倦遊慵入少年場

長吟酒醒憑闌處更聽秋碁答暮蟬

贈烏龍山圓上人

笑把儒冠換墨衣深思富貴有危機
參他龍象知今是還了鴛鴦悟昨非
開鉢展單隨所寓打包持錫去如飛
有人若問西來意正要高談為發揮

支頤

氣數推移有盛衰老觀此理獨支頤
閱人雲木能千載過眼風花只片時
名利場中棋變幻是非富裏浪傾危

到頭輸與山中叟樂在耕鋤別不知

淚

誰奏琵琶妒客歡
噓珠泣玉使心酸
感時多向英雄灑
怨別還從粉黛彈
每聽巴猿愁滴袂
莫燒漢蠟恐堆盤
陽關一曲君休唱
唱罷人間行路難

小隱

小隱山林習已成
市朝聲利讓渠爭
是非每向靜中見
悔吝多從動處生
且約蒼官陪竹友
共邀歡伯訪梅兄

歲寒心事期相守一瞬枯榮任變更

秋夜

城笳吹下暮雲邊螢照書帷夜未眠遊子不堪征袖薄
西風嬾誦擣衣篇

樓上

樓上何人奏玉簫數聲和月伴春宵斷腸喚起江南夢
愁絕寒梅酒半銷

宮詞

銀漏疎風透玉屏
碧梧枝上兩三更
依稀似寫華清恨
雲冷香銷夢不成

江湖小集卷九十二

欽定四庫全書

江湖小集卷九十三

宋 陳起 編

武衍藏拙餘藁

平生最愛讀洪文敏所編唐絕句手之輒不忍置今
閱此卷何翅千里對似人也龍泉張實甫充聖

東坡見齊安朱廣文小詩云官閒廳事冷蝴蝶上階
飛謂其可入圖畫適安此卷絕句模寫景物吟詠情
致多有可筆於丹青者惜不遇坡之品題端平丙申

夏五蕙巖方萬里

昔徐孝穆以魏叔之文沈於江曰吾與魏公藏拙衍
學詩三十年投質於宗工名勝者甚多藏拙之餘僅
存此稿故云淳祐改元立冬日衍書

秋夕過松陵

月冷江空夜氣濃桂香飛下廣庭風不知何處神仙過
鶴唳數聲烟靄中

鷺

柳外飛來恰弄聲
瞥然流去一梭輕
分明唬斷春愁處
風不驚花午院晴

宮詞補遺

梨花風動玉闌香
春色沉沉鎖建章
唯有落紅官不禁
儘教飛舞出官牆

牡丹春籞正穠華
有旨今年不賞花
翦落金盤三百朵
內批分賜近臣家

采桑曲

粉光薄薄髻雲垂
葉滿湘籠獨步時
女伴未來歸未得
水邊閒照插花枝

道是蠶忙未是忙
日長猶得事梳粧
羅敷有語何曾解
倚樹偷窺馬上郎

虛星壇月下聞笙

何人吹動玉笙攢
天濶風高桂殿寒
聲軋五雲飛不去
夜深和鶴落瑤臺

宮思

當時十五正嬌妍選入宮中二十年誰料祇今三十五
舞鞦未踏玉階前

書畫扇

雙成午夜約飛瓊齊駕紅鸞看月明縹緲碧雲歸去曉
洞天霜冷玉簫清

贈茗上隱者

夾谿槐柳綠雲堆轍蹟何嘗到碧苔不種桃花緣底事
恐因流水悞人來

開元廣寒詞

桂花珠殿水精樓
柘袖籠香乙夜遊
飛下銀橋人不覺
月明三十六宮秋

客去

晉人冠子羽人衣
客去移牀傍小池
扇影不搖蘄竹淨
藕花風裏看唐詩

遊吳門同樂園芥池光亭壁呈使君張都承

一城和氣萬花春
金碧樓臺處處新
太守不孤同樂意

木蘭堂上看遊人

春日舟中書所見

翠峰斜倚側金翹
羅帶縈紅冑
碧桃應是春愁禁不得
東風深院粉牆高

花外風來夾膩香
片雲誰遣下
巫陽不須回首頻相顧
彼美傷春易斷腸

明妃曲

一霎春風出塞行
六宮揮淚別傾城
當時誰議誅延壽

益重君王好色名

馬上風沙亂鬢蟬
羶鄉同地不同天
琵琶何用彈深怨
出降烏孫更可憐

聞角呈宗諭方蕙巖

曉角吹愁客夢寒
一聲聲落曲屏間
吳兒可殺無風味
老却梅花祇當閒

韓幹照夜白

八尺駟龍雪到蹄
阿瞞騎罷阿環騎
絕憐千古房星魄

不見明時見亂時

振金釵玉出天閑幾向驪宮驟月還脫使幹生天寶後
畫圖那得到人間

柳枝詞

靈和殿裏最風流三月飛花雪御樓換得玉人眉樣巧
一春渾不下簾鉤

秋夕清汎

弄月吹簫過石湖冷香搖蕩碧芙蓉
貪尋舊日鷗邊宿

露濕船頭數軸書

老將

幾回夢裏到邊陲
馬上猶能磨戰旗
彈淚對人偏愛說
建炎隨駕渡江時

春日湖上

苑外垂楊閱四朝
東風依舊綠條條
當年盛事人猶說
二殿龍舟泊畫橋

折桐花上雨初乾
寒食遊人盡出關
一片湖邊春富貴

斷橋船簇夕陽間

飛鷁鳴鑼鼓吹喧繁華應勝渡江前吟梅處士今還在
肯住孤山爾許年

船裏歌聲去復還遊人樂在酒杯間爭如策蹇長隄上
細看南山與北山

宜永觀雨

池上泠泠過雨聲綠荷風走萬珠明天公未欲從羣望
作佐了晚涼俄便晴

長橋月夕

卷來滄海黃銀浪飛出層雲白玉團千古垂虹奇絕處
獨凭三百赤闌干

雙鷺

誰驚雙鷺起蘋汀就裂玻璃細有聲飛入白雲渾不辨
碧山橫處忽分明

重訪西湖舊遊

西風吹曉鳳城開桂子香中信馬來十載不行湖上路

知它添了幾樓臺

榴花

慙慙生紅露滴珠薰風涼幌曉粧初折來戴朶頻拈看
應訝羅裙色不如

燕子

燕子攬風入畫楹不知人傍綠牕行香泥驚落忽飛去
却向桐華頂上鳴

老宮人

寶髻無光玉貌昏悲歌空感舊承恩君王喜問先朝事
時許車兒到殿門

侍輦觀花上苑春太皇宣索鳳笙頻如今猶記當時曲
對譜閒教小內人

湖亭席上贈商素

一曲春風已擅場淺顰低嚬更傳觴令人憶殺香山老
舊日玲瓏也姓商

貴遊

鈿車轆轤轆芳塵步障香移一片春花下玉盤行林巒
御前宣勸到湖濱

次平小景

一拂殘烟暝不收佐成谿上十分秋空林落日西風
急紅葉無詩水自流

尋昔遊

碧水青山舊路迷劉郎怡悵阮郎悲仙桃一別人間去
洞裏春風自四時

七夕

金鍼插並玉搔頭
月落河傾尚倚樓
細認雙星還自感
別離同是一般愁

雁奴

斷沙殘汐葑田枯
寂歷寒烟臥雁奴
飛起不知何處落
數聲鶯忽隔黃蘆

阮客

粉靨嬌春掌上輕
玉琴聲裏見深情
花邊臨別重回首

猶恐絲絃說未明

書吳江塔院水月

疊疊滄波隔亂山
白鷗飛去復飛還
吟邊好思無多子
祇在孤舟落照間

九日

倒盡鴟夷酒更沽
西風吹興滿江湖
客中賸喜身強健
歲歲秋香看紫萸

寄社友

東燭西園事已非更堪中酒落花時
隔簾燕子偏饒古
不管春愁倦作詩

立春

蓼滴辛盤色鬪鮮已將春到酒尊前
金幡不用吳娃祝
自唱新詞挿鬢邊

孤山訪梅不遇簡知己

結客尋春過舊隄雪香雲冷鎖雙扉
隔牆應是梅花笑
醉却貂裘尚未歸

雪中登垂虹亭

投箸江邊雪滿頭
玉虹千尺要詩酬
詩成馬上誰同說
說似亭前兩白鷗

江湖小集卷九十三

欽定四庫全書

江湖小集卷九十四

宋 陳起 編

武衍藏拙餘藁

霜梧

樓鳳枝頭數葉輕井邊籬落正關情
晚來縱有西風過

一片秋聲作不成

一作
做

湖邊

日日湖邊上小車要尋紅紫醉年華
東風合與春料理

忍把輕寒瘦杏花

示舩師

不拘早晚過長橋
要泊橋邊踏巨鼃
無月色時方得睡
有梅花處必停篙
不逢水活魚休買
纔見溪清米便淘
到得旗亭須報我
落帆相與醉村醪

立秋夕

水花香弄晚風清
閒立梧桐看月生
夜漏向深秋始覺
一天星濕露華明

新雁

塞月程程遠星河字字疎不眠沙外水恐濕足間書倦
翻支風去悲聲落枕初清秋人易感政自不關渠

春曉山行馬上口占

山深竹暗曉風輕幾樣幽禽錯雜鳴駐馬細聽渾不識
就中惟識杪歸聲

路轉前山復後山宿烟收盡薄生寒吟鞭忽指松梢月
絕勝城中樓上看

陽復

一變陽爻七日初
牕間測影弄徐徐
不知曾未添宮線
但覺多翻數頁書

劉八牕見訪一夕即別

五年苔上別別後
愧相疎今夕知何夕
憶渠俄見渠同
持一杯酒勝寄百封書
未及論心事
曉風回塞驢

悼戴式之

四海詩人說石屏
一時知己盡公卿
家傳衣鉢生無愧

氣挾江湖老更清，重感慨時多比興。
最瑰奇處是歌行，九原不作空遺藁。
三吟魂泪為傾。

嘗蒲萄

壓架駢枝露顆圓，水精落落照晴軒。
微酸自是江南種，尚忍因渠說太原。

睡覺

睡覺東風忽惘然，起翻雲母續爐烟。
半醒不醉宿醒思，欲雨又晴寒食天。
春草池塘詩夢裏，梨花庭院酒尊前。

誰憐倦客長安市節物驚心憶舊年

晴絲

何處飛來繚碧空敲吟終日費形容
搏桑老闕抽纖緯星殿殘機翦素絨
驚忽帶歸簾外燕等閒惹住柳邊蜂
風柔日薄樓臺晚一縷低垂力正慵

謝曹東圃跋陰卷

十年湖海仰師儒八斗衣傳子建餘
袖裏有詩須印證句中無眼定趨趨
吹香玉唾清如許刮膜金篦病已除

媿扇何曾求貴重等閒中得會稽書

楓橋道中

路接官河柳行斜蹇驢衝暑憇田家雨餘天迴雲生葉
日午風輕稻放花襍襖已縣黃犢睡桔槔不動綠陰遮
老翁相見如相識命坐藜牀自析瓜

郊居紀實

既安能適復何疑小築重營即舊規狡兔反為三窟累鷁
鷁終遂一枝期種成水際芙蓉徑鑿得亭前菡萏池客有

可人尊有酒四時風月總相宜

送外家通倅方澹庵

風節傳清素名多為宦遊
花封纔解綬芝檢趣監州等
上持麾節歸來覲冕旒
江南與江北底用說離愁

松陵晚泊

潏潏風濤外天隨低處尋
碧雲千障暝紅樹九秋深
故國荒城夢空江倦客心
行藏那復計蓬月闕孤斟

小遊仙詞

天風吹上碧嶙峋
鸞鶴聲清草木薰
金闕玉樓行欲遍
却携明月出紅雲

寄湯伯起

徙家城市去不為
故人留種菊應無地
觀山合起樓別
來通訊少春至
作詩不池上
雙桺綠孤吟
我正愁

次韻答菊莊湯伯起

數弓蔬地一方池
吾愛吾廬祇自知
蘆碧石補交楊柳
缺
桺紅攬上藕花遲
翠陰圍合疑無日
涼意蕭騷賸有詩

君欲重來須更待嫩烟浮動晚晴時

別燕

寶墨烟雲邈金風庭戶秋有雛堪作伴無計若為留謹
勿沾鯨浪應須避蜃樓裁詩聊寄遠煩慰玉人愁

西陵觀梅

障霜簪日奪天機九月梅花賞玉蕤到了不如春意勝
水邊風韻兩三枝

小院

小院清聲動碧梧
颯然涼思滿籬除
年來懶結青銓伴
却課兒曹讀夜書

夏日書事

緩將琴軫卷將書
誰信閒中事有餘
約客論茶和水試
課童移菊帶泥鉏
竹籠日午猶闌鶴
水檻朝來自餽魚
山薊已苗瓜已蔓
適安生計未全疎

訪隱者居

蘚墜披蘿入茅堂
着竹遮綠看流去
水紅惜落殘花蜀

鳥啼春靜山童厭客譁細觀題壁者一一是詩家

宮中詞

睡餘羅袖印眉山行傍粧臺理墜鬟聖主憂勤排當少
犀椎魚撥總成閒

邊烽既息檣事告登歌以五十六字用和擊壤
見說邊頭事已寧捷書復得壽春城從來方面多豪傑
均與朝廷繫重輕棗實雖紅休北顧稻花垂白近西成
民無飢色添歡色氣象方纔似太平

京口策應戍將歸營

老矣猶征調新從淮上歸盡知邊境事曾解壽春圍腥
血封刀匣黃沙漬鐵衣奏功均得賞沽酒醉斜暉

枕邊

枕邊清坐散餘醒慘澹西牕月半明燕子夢回簾未捲
棟花風信曉寒輕

癖

賸欲收神省費心三生癡癖本來深典衣尋訪晉朝盡

折簡借觀雷氏琴帖字逼真嘗細拊詩聯敲穩每長吟
鏡中一笑成何事鬢影秋絲日見侵

清明湖上

榆火初傳禁漏殘蒲城和氣在湖山接天楊柳風烟裏
照水桃花圖畫間舊路人穿新路去長橋船出短橋還
吾皇應喜民胥樂歲許西門入夜關

宿呂城舟中

古堞遺踪何處尋斷烟殘日意沉沉飛滿過關風雷怒

峭岸如山草木深
燈火鄰船喧客枕
江天漂梗碎鄉心
明朝沽酒新豐市
悵悵無人伴苦吟

送客之潤赴時貴約

折柳亭邊來問津
江山先入夢來頻
漕渠水足新逢雨
客路風光恰是春
莫論孫劉悲既往
願言賓主樂相親
留題短絕多佳景
君到應須為拂塵

送徐雲友歸行都

落落奇男子
長年走客塵
白身無寸祿
青眼欠高人
病

為思詩苦貧緣立行真片雲留不住歸醉洛陽春

伯氏自吳門來輦下再宿即別

把酒論新事移牀問故山桑麻云已長親戚喜相安
斷雁江湖外馳心夢寐間兩年三度別此別覺尤難

劉後村被召

街上官雖顯吟邊興不衰細評南嶽藁遠過後山詩才
大人多忌名高上素知辨香吾敢後幸見召環時

送友人赴長沙酒官

老楓殘月曉江濱送客歸來又送君
愁滴離聲三疊淚
眼穿行色萬重雲
過湘應取離騷續到邑終期課最聞
莫為西班羞薄宦要思先世立殊勲

杏花

柳店春風酒旆斜
紫綃團萼數枝花
香肌原自多豐膩
錯把梅花看作他

寓京口四首答湯菊莊兼簡分司鄭料院

北固亭口占

三生結得潤人緣
卮酒時來煖客羶
北固兒童雖不識
也緣巾履過山前

鵲山

屹然孤立蘚痕青
千古江湍洗不平
蒼鵲飛來復飛去
不知身為此山名

甘露寺很石

二雄曾向此般還
鼎立功名各未安
留得坐時頑石在
至今人尚說曹瞞

月觀遠眺

朝宗亭下浪冥冥何日尋觀瘞鶴銘更欲裹茶邀客去
短蓬敲火淪中泠

歲在丁亥郊裡禮成皇帝登門肆赦獲睹盛典
恭成口號

閭闔煌煌闢曉雲千官鵠立望嚴宸鶴書飛下珠簷峻
雉扇分開玉座新山壽聲中團喜氣鈞天奏處隔香塵
明王盛事民何幸三載恩寬四海春

正元二日與菊莊湯伯起歸隱陳鴻甫泛舟湖

上二首

春雲漠漠雨疎疎
小艇衝烟入畫圖
除却淡粧濃抹句
更將何語說西湖

櫂轉逋山艤落暉
春風深鎖恨依依
松間一鶴俄飛起
疑是先生出未歸

送蕙坡趙富陽赴高郵元幕見次

相逢客裏便相歡
握手真能出肺肝
買得酒尊曾共酌

帶來詩卷每容看
舊聞遊宦多知己
今喜公朝與好官
一片淮雲千里月
覲圭何日入長安

蘆笋

春風荻渚暗潮平
紫綠尖新嫩茁生
帶水掐來隨手脆
擢船歸去滿篝輕
竹根稚子難專美
澗底香芹可配羹
風味祇應漁舍占
玉般空厭五侯鯖

湖亭席上

寒食梨花月新晴
楊柳風愁融山色
裏興極酒杯中綠

髮日夜變青春今古同忍教行樂處容易夕陽紅

哀魏方泉

每見中吳士多稱太守賢一毫無暴政千里樂豐年心
醉西樓月身飛北闕天那知人事異夢絕柳橋邊

詔下催歸覲人傳便尹京班纔聯從橐庭忽舞銘旌玉
樹悲中折金丹聖莫生澤多唯乳子天道若無情


寄吳德章簽判

莫轉朱絃軫知音世不慳吟情清似水壯志屹於山自

入鄉關去相思雲樹間春風吹五葉早趁集英班

書所懷

閒拂塵中鏡猶憐壁上梭生平多坎壈知己半銷磨對
酒成孤酌橫琴寓九歌相思江水濶歲晚客如何



江湖小集卷九十四

欽定四庫全書

集部

江湖小集卷九十五

詳校官中書_臣張姚成

助教_臣常循覆勘

覆校官主事_臣龔敬身

校對官助教_臣胡予襄

謄錄監生_臣謝承蔭

欽定四庫全書

江湖小集卷九十五

宋 陳起 編

林同孝詩

寒齋力辭聘召死於隱約子同合以表其阡旌其閭
為未足也行其書焉嗣其學焉同又撫載籍以來孝
於父母者事為一詩詩具一意各二韻二十字積至
三百首起遂古迄叔季兼取明天理未嘗泯也自聖
賢至鳥獸昆蟲並錄見天性未嘗異也事陳而意新

辭約而義博賢於烟雲月霧之作遠矣始寒齋之事
寶章也視調脩裼襲之節以康其體躬場圃井臼之
勞以裕其力人知寶章之勇於退而不知其退之有
以自樂也同合之事寒齋也亦然昔曾元養參已不
如參之養哲石奮諸子恬侯稍不逮建至孫而孝謹
遂衰今石塘之林奕世家法嗣守不墜有古人所難
能者惜其弟兄俱未脫白修於家浮沉於閭里而已
余常恨世儒率華過其實惟同華實相符其操行蓋

漢孝廉之盛舉也詞藝亦唐進士之高選也頃良齋
謝公嘗彙孝史五十卷上之阜陵同此詩他日必與
謝公孝史並行淳祐庚戌白露節前史官劉克莊序

堯

道之大原出于天堯以是道
傳之舜堯舜之道孝悌而已

道原自天出堯以是相傳曰孝悌而已人人具此天

舜

大孝終身慕父母
子於大舜見之矣

孩提知所愛妻子具而衰大孝終身慕子於舜見之

禹

禹傷先人之功不成勞身焦思八年于外
啓呱呱而泣予弗子惟荒度土功

傷心九載績焦思八年中啓亦呱呱泣惟思度土功

湯

葛伯不祀湯使亳衆往
為之耕 奉先思孝

奉先思孝也不祀豈其情以至使亳衆而甘為葛耕

文王

朝於王季日三雞初鳴至寢門外問
安否何如日中至及暮又至亦如之

問安寢門外旦旦俟雞鳴以至日中昃居常盡此誠

武王

文王有疾不說冠帶而養文王再飯
亦再飯疾間曰女何夢夢帝與九齡

經言事父孝所以事天明疾間加再飯夢中與九齡

周公

我之弗辟我無以告我先王辟馬鄭
音避謂避居東都 東山周公東征

我避故云辟東行是謂征先王猶可告豈為伐而刑

孔子

子曰所求乎子
以事父未能也

事親良不易戰戰兢兢學得如夫子猶言丘未能

顏子

謂子路曰去國則哭於墓而
後行返其國不哭展墓而入

返必展墓入去當哭墓行誰知顏氏子事死乃如生

孟子

幼被慈母三遷之教
長師孔子之孫子思

如何年稍長汲汲子思師知是為兒日三遷感母慈

右聖人之孝十首

契

契為司徒教以人倫父子有親

天性生雖具人倫教可無往哉親父子汝契作司徒

元凱

左傳季文子曰孝敬忠信為吉德高陽高辛氏有才子謂之八元八凱

當知元與凱不出孝而忠能舉十六相斯為舜大功

孝已

武丁之子莊子云人莫不欲其子之孝孝已憂而魯參悲

子則欲其孝人皆有是心如何武丁聖却使子憂深

微子

微子之命曰爾惟恪慎克孝微子去之子曰殷有三仁焉

豈計身封宋祇愁祀絕殷不惟稱克孝亦自首三仁

秦伯

季歷有聖子知太王欲立之逃奔子貢曰秦伯端委治吳仲雍斷髮文身

為憐季有子逆探父傳賢斷髮文身事誣哉司馬遷

康叔

元惡大慙矧惟不孝不友子弗祇服
厥父事大傷厥考心乃其刑茲無赦

勿云服父事不敬亦無傷元惡與大慙邦刑自有常

君陳

惟爾令德孝恭惟孝友于兄弟
克施有政命汝尹茲東郊敬哉

為爾有令德存心孝且恭推之施有政往矣尹茲東

伯奇

尹吉甫子履霜操云無衣兮兒寒無食兮兒飢兒罪兮當笞逐兒兮奚為

無食又無衣逐兒安所之不辭履霜苦猶謂罪當笞

晉文侯

平王錫文侯秬鬯圭瓚曰汝克昭乃顯祖追孝于前文人若汝子嘉

嘉汝故錫汝非將王展親克昭乃顯祖追孝爾文人

衛武公

年九十猶日警于國曰必朝夕以交戒我又孝子之身終

孝子身終者非終父母身武公年九十戒我尚諄諄

齊孝公

伐魯展喜犒師曰豈其嗣世而棄命若先君何君必不然齊侯乃還

宣其伐與國獨不念先君想得還師去難堪此語聞

齊侯無野

晉人欲質其母對曰若以匹敵則亦晉君之母也又漢太公事

我母亦君母吾翁即若翁分羹何太忍請質可堪從

申生

姬泣曰賊由太子人謂太子子辭姬必有罪曰君老矣吾又不樂乃縊死

姬泣賊由子子辭必罪姬為憂君不樂寧死莫君知

晉文公

寺人披伐蒲公曰君父之命不校校者吾讎也踰垣而走披斬其袪

伐蒲君父命校者是吾讎披直寺人耳鉏麇信有謀

秦康公

晉文公甥渭陽詩云我見舅氏如母存焉又曰我送舅氏悠悠我思

懷哉送舅氏曰至渭之陽念母如存意悠悠寄二章

既醉君子

孝子不匱永錫爾類其類維何
室家之壺蔭爾女士從以孫子

若為錫爾類不獨善其身既念化家室還思遺子孫

四牡使臣

有功見知則說矣四牡駢駢豈
不懷歸王事靡盬不遑將父母

懷歸將父母四牡苦駢駢是我心中事君從何處知

南陔孝子

南陔孝子相戒以
養也晉束皙補亡

為孝還相戒南陔昔有詩都盧這箇意焉用補亡為

白華孝子

白華孝子
之潔白也

廉恥有微缺須知孝未純白華何所似所似皎然身

北山大夫

役使不均已勞於王事不得養
其父母焉王事靡盬憂我父母

非止不得養如憂父母何忍能不我念使我獨賢勞

蓼莪孝子

民人勞苦不得終養哀哀父母
生我劬勞欲報之德昊天罔極

莫遂終養志難酬罔極恩哀哀父母向腸斷不堪聞

妹土小子

其藝黍稷奔走事厥考厥長肇
牽車牛遠服賈用孝養厥父母

勤耕藝黍稷遠賈服車牛奔走何為者心乎孝養憂

老萊子

年已七十父母猶存著斑
斕之衣為嬰兒戲于親前

七十已中壽人生似此稀絕憐老萊子猶自作兒嬉

柳下惠

三為魯士師曰何必去父母之邦

忍於父母國去此欲何之所以柳下季三為魯士師

子思

孔子喟然而嘆請曰意子孫將泰祖乎假每以不克負荷為大恐子忻然

如何方喟嘆乃爾復忻然念汝祖無忝知子道可傳

閔子

子曰孝哉閔子騫人不聞於其父母昆弟之言又曾子母投杼事

參寧殺人者三至母踰垣嘆息子閔子孝哉無間言

有子

其為人也孝悌而好作亂者未有也
涼州易亂課人誦孝經蓋勲謂取怨

其為人也孝好亂未之聞曾以是取怨無人語蓋勲

曾子

有疾召門弟子曰啓予足啓予
手而今而後吾知免夫小子

全歸有明訓珍重恐傷膚小子啓手足吾今知免夫

子路

見孔子曰今由也累茵而坐列鼎而
食願欲食藜藿為親負米不可得矣

食藜殊列鼎負米異重固不待今朝養傷哉昔日貧

子游

問孝子曰今之孝者是謂能養至
於犬馬皆能有養不敬何以別乎

犬馬何以別斯言似太深深言為養者可不敬於心

子夏

既除喪而見孔子與之琴彈之
而不成聲作而曰哀未忘也

為有心中事琴音自不和禮雖弗敢過哀若未忘何

子貢

曰賜也願息於事親 又曰大哉死
乎君子息焉 又大塊息我以死

未須論大塊以死息乎人所願學也賜姑為息事親

林放

問禮之本子曰禮與其奢
也寧儉喪與其易也寧戚

故寧戚以儉罔或易而奢致得千載下人稱問禮家

樊遲

問辨惑子曰一朝之忿忘
其身以及其親非惑歟

當知一朝忿必不忍於人豈知身忘却還應及乃親

闕黨子弟

闕黨之子弟罔不分均有親者取多孝悌以化之也

既漸夫子教罔有不分均何復間多取齊言彼有親

樂正子春

侍親疾復加一飯則脫然愈復損一飯則脫然愈

向非親在念念每精專未必飯加損能令疾脫然

公明宣

學於魯子曰宣見夫子之親在叱咤不至犬馬宣說之學而未能也

子於親在日叱咤不聞聲既曰見而說應無學未能

孔子黨人

孔子曰吾黨之直者子
為父隱直在其中矣

忍以證羊故而云我直躬那知為父隱直故在其中

孟莊子

孟莊子之孝其不改父之
臣與父之政是難能也

無改父之道真堪以孝稱若論莊子孝此直是難能

孟懿子

問孝子曰無違樊遲御子告曰生事之以禮死葬之以禮祭之以禮

不復問無違祇應懿子知尚愁人不省以禮告樊遲

孟武伯

問孝子曰父母惟其疾之憂

父母之愛子心乎惟疾憂可能不自愛而忍使親愁

管仲

曰吾嘗三戰三走鮑叔不以我為怯知我有老母也

戰敗不羞走誰為知我深叔知我有母亮我走時心

晏子

曰使吾父之黨無不樂生者
使吾母之黨無不足衣食者

母家令足食父族使安生睦黨可謂孝能之惟晏嬰

晉君子

下從征役不得養其父母父母何
怙父母何嘗悠悠蒼天曷其有常

何怙復何嘗銜悲問彼蒼蒼蒼不可問重使我心傷

潁考叔

留羹感鄭莊公母子如初見左傳
茅焦諫始皇即虛左迎母見史記

茅焦甘伏質考叔請留羹大隧如初樂咸陽虛左迎

魏孝子

役於大國陟彼岵兮瞻望母兮
狄仁傑登山望雲曰吾親舍其下

念母嗟陟岵思親徒望雲可憐魏孝子不比狄參軍

衛七子

凱風美七子能盡孝道以慰母心
小弁小人之詩也何以言之曰怨

幾諫勞不怨明明在魯論未應小弁作得並凱風言

石祁子

石駘仲卒卜所以為後者曰沐浴
佩玉則兆不沐浴佩玉石初子兆

執親之喪者可沐浴其身不待石初兆知非佩玉人

文氏子

既除喪而越人吊待廟垂泣洩子
游曰其庶幾乎亡於禮者之禮也

服除有弔者待廟至垂洩亡於禮之禮斯人其庶幾

公叔戌

請父讞於君君曰夫子不亦貞
惠文乎故謂夫子貞惠文子

若把夫子論無慚貞惠文不應其子戌至自請於君

靈輒

翳桑餓者趙宣子食之捨其半云欲遺母宣子使盡之而別具食與其母

翳桑一餓者念念母之存賴有趙宣子能為別具殮

葉公諸梁

后臧從其母於吳不待而歸葉公終不正視

隨母適異國先歸汝忍能致人不正視應是得人憎

伍尚

楚將殺其父奢慮二子為患曰盍以免其父召之彼仁必來尚歸死負奔吳

此以父免召彼如仁必來員乎竟何益尚也最堪哀

賈獲

陳大夫鄭師入陳獲載其母妻奔逢
陳侯下而授公車與妻扶母奔亦免

扶母猶可免棄君安所之可能共母載忍不授君綏

周紹

趙王謂曰人有言子者曰父之孝
子君之忠臣故寡人欲子傅王子

欲得忠臣者求之孝子門如何傅王子尚復待人言

王孫賈

母曰汝朝出晚來則吾倚門望汝
今王走汝尚何歸賈募人殺淖齒

為齊臣子者此日若無聞獨有王孫賈能知慰倚門

扶蘓

趙高詐為書賜扶蘓死蒙恬疑之欲
復請扶蘓曰父而賜子死尚安復請

父賜子以死君侯安所疑忍哉指鹿相無復祖龍知

丁蘭

至孝刻木為母像事之如生蘭
婦誤燒木母面應時髮落如割

一靈長皎皎如月不離天要以純誠感非因刻像然

韓伯瑜

母杖不痛哀母力弱對母悲泣梁
彥先使焦通觀其像通感悟盡孝

母力今衰矣悲噓得杖輕流風存繪畫猶足感焦生

酈寄

與呂祿善周勃劫其父商使
寄紹祿出游勃乃得入北軍

直以劫父故蒙他賣友名聞將誅呂論非勃亦非平

賈誼

治安策曰借父耰鋤慮有
德色母取其箒立而諄語

諄言取箕箒德色借耰鋤不是賈年少還能痛哭無

馮唐

以孝著為郎中署長文帝輦
過問唐曰父老何自為郎

知以孝行著還應不問唐可憐止輦問何自得為郎

韋孟

楚元王傳及王戊淫亂孟去位徙鄒
作詩諷諫又曰既去襴祖惟懷惟顧

去王猶諷諫懷祖重傷情誰識有韋孟人惟說穆生

田叔

景帝令案梁事還曰有之無以梁事為問也太后食不甘味此憂在陛下

勿以梁事問將遺太后憂若非叔長者誰為帝忠謀

石建

建為郎中令已老白首每歸洗沐即竊取父奮中帟親自浣滌不令父知

服勞曾孝道那更委諸人建已老白首中帟滌必親

董仲舒

令州郡舉孝廉自仲舒發之後為江都相

漢有孝廉舉誰知發自舒可憐三策罷却去相江都

司馬遷

父談執手泣曰母忘吾所論著卒
三歲遷為太史紬石室金匱之書

悲哉執手泣論著謹毋忘宜識遷他日能紬石室藏

嚴君平

賣卜成都市與人
子言必依於孝

賣卜有深意何心避市喧若逢人子問依孝與之言

霍去病

縣吏仲孺私生以驃騎擊匈奴過
平陽拜仲孺曰不知為大人遺體

不早知此體元來托大人低頭拜縣吏誰擬霍將軍

雋不疑

為京兆尹每錄囚母聞多有平反即為喜笑故不疑嚴而不殘

不疑固嚴吏如不順親何圖得母喜笑平反敢不多

杜延年

父周為御史大夫延年居父官府不敢當舊位坐卧皆易其處

怪來御史府坐榻不如初曾是父坐處而為子敢居

疏受

廣之兄子廣謂受曰知足不辱宜如
父子歸老故鄉乎受曰從大人議

豈知吾父子歸老故鄉身一聽知足誨欣然從大人

王陽

為益州刺史行部至九折阪嘆曰奉
先人遺體柰何數乘此險遂以病去

禮經稱孝子不服闇登危所以九折阪回車不敢馳

貢禹

上疏曰詩逆者貴於官故俗皆曰何
以孝弟為今宜貴孝弟則天下自治

安用孝與弟今人諄得官一聞陽在位自是合彈冠

王式

曰臣以詩朝夕授王至于忠臣孝子之篇未嘗不流涕反復為王陳誦也

三百五篇內凡言忠孝人未嘗不流涕反復為王陳

韋玄成

兄弘前坐罪玄成當襲封知非父賢意即陽狂後選為淮陽憲王傅

淮陽誰可傳無以易玄成即汝陽狂意為王言事兄

楚孝王

詔曰王孝順仁慈之國以來二十餘年纖芥之過未嘗朕甚嘉之

一自王之國于今二十年了無纖芥過都是孝慈然

原陟

廬墓三年大治冢舍表曰
南陽阡人謂之原氏阡

所當約於已豈忍儉其先道立南陽表人呼原氏阡

薛脩

為臨菑令兄宣為丞
相迎母脩留不遣

邑令直微爾爭如相國榮可憐留母養不忍聽兄迎

陰子方

至孝臘日晨炊而竈神形見子方
再拜受慶因祀以黃羊自是暴富

祀竈令人富相傳陰子方安知由至孝非在薦黃羊

揚子

不可得而久者父母之
謂也是故孝子愛日

不可得而久其惟父母乎諄諄愛日語揚氏豈欺予

東海王疆

母郭后廢疆戚戚不自安願備
蒲國贊曰避而知廢為吳太伯

史以太伯比斯評恐未真我知東海意不忍母他人

鄧禹

事母至孝雲臺功臣之次禹為第一

功臣三十二劔佩藹雲臺第一人知否曾聞孝母來

竇融

少孤事母孝與隗囂書云為忠甚易
璽書賜融謂欲三分鼎足宜以時定

璽書來萬里鼎足定三分解道為忠易誰知以孝聞

馬援

戒子曰欲汝曹聞人過失如聞父母
之名耳可得聞口不可得而言也

惡言出於口必至反其聲小子聞人過當知聞父名

樊宏

父重遺令所假貸民間數百萬悉焚
削文契債家聞而慙爭償之宏不受

能捐數百萬不聽債家償要自父一語銘心不敢忘

耿國

國當嗣父封上疏以父
况愛少子霸固自陳讓

封侯誰不願顧我獨何心為憶父所愛偏於少子深

張湛

望縣門步進曰父母之國所宜盡禮
或議其詐笑曰人皆詐惡我獨詐善

下車父母國自重豈其輕謂我詐為善何憂被此名

馮豹

後母履行毒害敬事愈謹疾之愈深
每奏事伏省閤帝使黃門持被覆之

中人持被覆尚得帝恩深子職竟何是終求慰母心

孔奮

奉母極求珍膳躬率妻子同甘菜茹
為時人所笑以身處脂膏不能自潤

甘同妻菜茹極奉母珍羞一任時人笑脂膏不自謀

伏湛

父理為當世名儒別自名學湛
性孝友少傳父業教授數百人

向來父學顯別自以家名不是能傳業如何著孝聲

鄭敬

鄧惲謂曰子將為伊呂乎巢許乎敬
曰幸得奉墳墓雖不從政是亦為政

幾曾慕巢許非是薄伊周何忍的的去先人有墓丘

古初

鄧惲為長沙太守長沙有
孝子古初惲即以為首舉

長沙有孝子姓字死猶香料得郡舉首他無人敢當

江革

負母逃難數為盜劫去輒求哀得免
後歸鄉里每自為母挽車時稱巨孝

挽車極勞苦逃賊最間關太息江巨孝能為人所難

蔡順

拾甚黑者奉母母思順心動棄薪還
伏母棺火越它舍母畏雷震輒圍墓

賊疑食甚異母怪棄薪還雷震輒圍家火飛因伏棺

姜詩

妻汲供母後時遣去遺母珍羞復還
兒溺答母游學忽泉湧躍鯉供母膳

日常供鯉膾且輒汲江流兒溺言游學妻還感遺羞

郭巨

恐母減食與子欲埋之掘坑得金一
釜上云天賜郭巨孝子官不得取

為養寧埋子那知地有金如何有天賜且復怕官侵

班固

著幽通賦曰懿前烈之純淑兮咨孤
矇之眇眇兮又作叙傳述班氏之先

前烈知純淑孤縱愧眇矇果能筆叙傳不枉賦幽通

劉平

負母逃難恐絕弟類抱弟女棄己子
鄧伯道負弟子避賊縛其子於樹上

弟類那容絕吾雛聽自生劉平端為母伯道特沽名

郭基

為京兆督郵班固薦於東平王
蒼謂基孝行著於州里蒼納之

豈伊東閣裏無似督郵賢直把孝行薦今人少孟堅

廉范

年十五與客自蜀步負父喪歸京兆
後為蜀守民歌曰平生無襦今五袴

親喪徒步負萬里歷岷峨何事今人說惟知襦袴歌

鄧彪

少修孝行讓國於異母弟荆鳳顯宗
高其節下詔許焉 又曹子建詩

讓國異母弟如彪正自奇今人有同產煮豆且燃萁

張歆

歆守臯長有報父仇賊歆破械縱之
遂棄官亡命范曄謂其報仇逃亡

去官因脫囚為感戴天讎史氏乃失實却云逃報仇

清河王慶

上書曰乞以臣骸骨下從貴人
於樊濯庶母子魂靈有所依倚

乞以臣骸骨下從樊濯原生雖闕親養沒擬報私恩

魯恭

性至孝與母及弟丕俱居太學習
魯詩為諸儒所稱學士爭歸之

可能來太學即得譽諸儒宜以習詩苦應云與母俱

黃香

事父竭力致養暑則扇枕寒則以身
煖席京師號曰天下無雙江夏黃童

冬月常溫席炎天每扇牀如何漢天下只有一黃香

樂恢

父親為令所收恢年十五俯伏縣門晝夜號泣令矜之為出其父

父今為縣繫號泣不停聲彼令亦人耳而寧不我矜

仲長統

著論曰儻養親有兼珍之膳宜羨夫入帝王之門以揚名立身哉

羨入帝王門揚名與立身何如養親膳每日得兼珍

薛包

父娶後妻憎包分出之包號泣廬於舍外旦入洒掃歲餘父母慙而還之

所懼子不孝何愁父失慈涕流分出日天定感還時

張霸

年數歲知孝讓舉動自然合禮人訝其小能如此曰我饒為之故字伯饒

幼也知孝讓居然合禮儀休疑汝尚小須信我饒為

竇章

蓬戶蔬食躬勤孝養講誦不輟時稱東觀為蓬萊山鄧康薦章為校書郎

蔬食可堪貧勤哉孝養親蓬萊知不遠應是著斯人

蘓不韋

父謙為孝，鬻掠死，不韋掘鬻父冢，時譏其讎枯骨。郭太謂優出伍，負

要使生者毒休譏枯骨，讎看他郭太論比似伍負優。

郭林宗

性至孝，范滂稱之曰：「隱不違親，貞不絕俗。」天子不得臣，諸侯不得友。

不願諸侯友，那容天子臣。貞乎寧絕俗，隱也不違親。

蔡邕

性篤孝，母嘗滯病三年，邕自非寒暑節變，未嘗解襟帶。

自非易寒暑，未始解衣襟。不謂母疾久三年，惟一心。

楊震

種藍養母諸生有助其種者輒拔去鄉里稱孝又不受金以畏四知

尚自畏四知於親豈忍欺種藍有助者拔去不妨奇

姜肱

肱與弟俱為賊所劫將烹之肱曰季江父母所憐請殺已季江復願代兄

鼎鑊皆知避何心願代兄恐傷父母意不獨弟兄情

陳元方

事親至孝豫州刺史以聞天子為之圖像百城以厲風俗

如何百城內一一盡元方勸孝賢刺史觀風職所當

茅容

字季偉郭林宗見其殺雞意謂為已
設既乃獨奉母自以飯蔬與林宗食

雞乃為母設蔬惟與客同賢哉茅季偉誤矣郭林宗

范滂

遭黨禍恐母流離不忍逃曰滂從父
黃泉顧子曰欲汝為善則我不為惡

寧將身塞禍不忍母流離我自不為惡黃泉今有辭

鮑永

事後母至孝妻嘗母
前叱狗永即去其妻

禮經條七出叱狗不言焉一旦鮑妻去那知在母前

仇覽

為蒲亭長化陳元為孝子民歌曰父
母在何在我庭化我鴟梟哺所生

蒲亭一長耳何許得歌聲化我鴟梟類而令哺所生

趙咨

有孝行盜嘗夜劫之咨恐母
驚乃先至門迎謝盜慙奔

賊來那可邇而敢以身迎身豈不知愛心乎恐母驚

鄭康成

家貧假田播殖以為親養
時稱為純儒齊魯間宗之

播殖為親養家貧至假田焉知後學者盡喚作儒先

李曇

養親樂道終身不仕名與徐
孺子等海內列名五處士焉

養親還樂道不仕至終身海內稱高士非專鄉里人

徐季登

南州高士徐孺子之子篤
行孝弟服闋隱居不仕

南州徐高士姓字滿東都有子篤孝行終喪竟隱居

周燮

有先人草廬結于東岡燮守之曰
吾不能追綺季處巢穴屢徵不起

未能追綺季且復守東岡為有先廬在它山忍遁藏

王脩

七歲母以社日亡來歲鄉里社
脩感念母哀甚鄉里為之罷社

去年今社日撫字倍酸辛罷社為兒泣鄉鄰定可人

徐庶

辭先主曰老母見獲方寸亂矣王陵曰母為語陵母以老妾故持二心

不勝方寸亂豈暇二心持忍矣王陵將賢哉徐庶辭

孟宗

母冬月思笋宗入竹林哀泣笋為之生

萬象死灰色千林號怒聲何人苦哀泣凍竹強抽萌

顧悌

仕吳為偏將軍每得父書拜跪讀之每向應諾又孝子聽于無聲

地遠隔親面惟憑一紙書句中輒應諾直是聽於無

陸績

六歲見袁術懷橘墮地術曰陸郎作賓客而懷橘乎曰欲歸遺母術奇之

陸郎作賓客懷橘欲何為遺母當然事袁公乃爾奇

李密

祖母劉年九十六謂報劉之日短又言為人子者願為人兄事親之日長

事親若日短為子願為兄懇懇報劉語令人涕泗橫

和嶠

王戎居喪飲酒哀毀特甚嶠禮法自持不能踰戎劉毅謂嶠生孝戎死孝

要以禮法論休言哀毀同但觀生和嶠定勝死王戎

王裒

讀詩至蓼莪篇輒流涕門人為廢此篇廬墓悲號泣著栢樹樹為之枯

悲哉生我句柰此念親何墓側有枯樹詩中無蓼莪

荀何

晉何曾荀顗俱有孝行傳玄稱之曰古稱魯閔今見荀何

古稱有魯閔今復見荀何為孝一而已能行無甚高

王祥

母冬月欲生魚祥解衣將剖冰雙鯉
躍出母命守柰每風雨輒抱樹泣

風柰應難守冬魚未易求剖冰不辭凍抱樹可勝愁

祖納

性至孝少孤常
自炊爨以養母

視膳子之職何須自執炊閒將心比合並是手成持

丁儀子

陳壽覓斛斛米為儀作傳子不與
壽米文略大遺魏收金請為父傳

尚自不與米何堪大遺金丁儀為有子文略是誣親

范宣

十歲嘗以刀傷手捧手改容人問痛耶曰受全之體而致毀傷不可處耳

手直微傷爾如何忽改容不能全所受此痛政無窮

戴逵子

戴顒與兄勃並受琴於父逵父卒不忍奏與兄各造新弄並行於世

戴琴妙一世二子得其聲不忍遺音奏各將新弄行

趙至

兒時從師授業聞父叱牛聲投書泣曰我小未能榮養使老父不免勤苦

莫致兒勞養翻令父苦耕可憐廢書泣不忍叱牛聲

陶侃

每飲酒常歡有餘而限已竭佐吏等勸少進侃曰亡親曾見約故不敢踰

陶公宴參佐限極每歡餘憶與亡親約淒然不敢踰

桓沖

小字買德郎母病須羊以解以身質羊後為江州刺史

不辭身作質只為母須羊此日江州牧當年買德郎

盛彥

母失明婢伺彥出以蟻螬炙飴母彥
抱母慟哭絕而復蘇母目忽然即開

既知為異物號泣絕還生未有蟻螬炙翻令母目明

王延

後母令冬月求魚不得杖之流血延
叩冰哭有魚躍出母悟撫之如己子

酷矣杖流血奇哉魚躍冰能令母心悟不異已親生

楮德逸

庾袞字叔褒鄰人楮得逸善事
其親老而不倦袞每見拜之

至老能無倦真為善事親叔褒非佞者何事拜鄰人

王悅

導之子有高名事親色養諸
子莫及導見之輒有喜色

色養傾餘子高明重有時足為丞相喜豈計外人知

許孜

有孝行鷹雉棲其梁鹿虎擾其庭交
頸同遊不相搏噬所居號孝順里

能感猛鷙類都無搏噬心同遊至鹿虎共宿有鳩鷹

卞壺子

壺拒蘇峻戰死二子矜盱相隨赴
賊翟湯曰忠孝之道萃于一門

父雖得死所兒豈望生存忠孝古難並于今萃一門

皇甫謐

遺令平生之物皆無自隨惟賣孝經一卷
馮亮遺戒手執孝經

盡棄生平物惟齋一孝經死猶不忘孝臨沒苦丁寧

郭原平

以耕者於父母墓前裸袒為嫚乃
貴買此田束帶垂泣躬自耕墾

忍向父母墓前頭裸袒耕農時每束帶猶自泣原平

二王

王銓學業不及弟錫而孝行
齊焉時人稱為金昆玉友

要以孝行取寧將學業論錫無慙玉友銓可謂金昆

樂頤之

嘗病與母隔壁忍痛不為呻吟
之聲嚙被至碎恐母哀已也

痛殊未易忍絕不一呻吟豈復知身疾惟愁戚母心

何子平

以俸米易粟麥曰尊老在東何心
獨享白粳珍肴不可寄母則不受

干祿本為養資身豈所安珍肴與白粳雖美不為餐

解叔謙

母病有老父遺丁公藤因失所在
有童子持蚶蛇膽授顏舍忽不見

膽醫顏母疾藤療解親風忽不見童子俄然失老公

王秀之

遺令世人以僕妾直靈助哭當由
喪主不能純至欲以多聲相亂耳

一事直堪笑今人妾直靈都緣無至性徒欲亂多聲

謝瞻

年數歲所生母微賤得疾畏警一家
尊卑感瞻至性咸為納屨行屏氣語

一家感兒孝不欲使親驚盡作屏氣語咸為納屣行

謝肫

肫莊之子超宗鳳之子明帝嘗敕二人自鳳莊門入超宗趨往肫不肯入

直以父名戲其為君命同肫能禮自處似是勝超宗

古成詵

以風教自任時韋高慕阮籍為人
居喪飲酒詵泣曰吾當手刃之

禮豈為我設如傷風教何不堪晞阮籍直欲刃韋高

華寶

八歲晉末父戌長安謂曰須我還為
汝冠後長安陷寶年至七十不婚冠

憶父去時語爾來七十秋終焉不忍冠洒淚望秦州

宗元卿

祖母病元卿在遠輒心痛
大病則大痛小病則小痛

異哉宗子孝親疾遠關心每驗痛大小因知疾淺深

劉苞

事嫡母朱氏及所生
母陳氏並扇席溫枕

扇席更溫枕古人誰語同一心奉二母自是勝黃童

劉靈哲

母病夢人與藥驚覺得於枕間
宋瓊母季秋思瓜瓊夢見求之遂獲

誰言夢相裏所見總空花靈哲枕間藥宋瓊秋季瓜

劉璫

號正簡先生齊高帝召
問政道答曰政在孝經

先生天下士偶迫詔書行勿謂無奇對惟言在孝經

王僧孺

五歲初讀孝經謂
授者曰願常讀之

孝經惟始教何但習於初欲得如兒願常常誦此書

江泌

痛不逮親養以菜心有生意不忍食所食惟老菜

菜心且不食親念一何深為爾有生意存吾不忍心

庾道愍

少失所生母尋求至交州入一村見一姬負薪心動訪之乃其母也

交州一村裏有姬負薪行萬里庾道愍心知為所生

張冲

父遺命祭我必以鄉土所出後牧
青冀常還吳國取果菜流涕薦焉

未嘗無果菜何至取吳中祭我必土產遺言敢不共

顧歡

有孝行人有病者歡令取
孝經著病人枕邊果愈

枕邊何所有一卷仲尼居無處覓盧扁應當寶此書

江淹

採薪養母於樵所得貂蟬將鬻以供
養母曰此汝休徵留之後果為侍中

賣薪圖養母何許得貂蟬知在採薪處庸非吉兆然

庾黔婁

父在家病黔婁忽心驚即棄官歸
醫云嘗糞可知差劇每取糞嘗之

驚心已云異嘗糞不妨難庾令何為者憑君著眼看

庾域

母好鶴唳域營求不急忽雙鶴來
下戴良自據地作驢鳴以娛母

惜哉戴良誕賢哉庾域誠真能感鶴唳何至學驢鳴

任昉

父遙性重檳榔終身不嘗
曾嗜羊棗而曾子不忍食

折常嗜羊棗遙亦重檳榔參至不忍食昉寧能獨嘗

陸襄

釋服猶若居憂終身蔬食布衣五
十年又楊惲云送終有時而既

憂居五十載陸子最堪悲惲獨非人子而云有既時

楮翔

有至行母病祈禱中夜聞
空中彈指聲及旦疾愈

謹母昧方寸是處有神明夜半為親禱空中彈指聲

徐孝克

每侍宴無所食噉帝得察知其欲
遺母敕自今孝克前饌並許將還

自今所賜饌特敕許將還為爾心餉母君前無所餐

阮孝緒

母病須生人參孝緒躬歷幽險累
日忽見一鹿隨之至鹿滅處得參

覓參不可得忽感鹿前行行到鹿滅處元來此地生

袁君正

數歲父昂疾晝夜侍奉家人勸令
暫卧君正曰官既未恙眠亦不安

家人勸我睡共說不眠難官既未得恙眠時自不安

皇侃

性至孝日限誦孝經二十遍以擬觀世音經

儒釋本同途遺經非爾殊未應普門品勝似仲尼居

吉玠

丹楊尹以其求代父命欲舉純孝玠曰何待玠之薄因父買名一何其辱

父身如可代子死乃其情尹代我何薄而將此買名

吳明徹

父未葬勤力耕種天旱苗枯明徹之田中仰天號訴苗更生秋大熟

苗枯親未葬號泣日于田誰謂竟不雨而能獨有年

徐盼

父陵疾篤盼焚香涕泣跪誦孝經晝夜不息如是三日父疾豁然而愈

父疾亦云篤如何豁爾平孝經惟泣誦晝夜不停聲

雷紹

少習騎射後辭母京師從學嘗讀書至人行莫大于孝感嘆還鄉里侍養

行莫大於孝其如違養何只消一句子安用讀書多

楊愔

幼喪母其舅源子恭與飲問誦
詩曰誦至渭陽未惜便號泣

渭陽曾讀未對酒偶言詩舅作如此語兒那能不悲

趙琰

以國禁積四十年不得越閭葬二親
於舊兆自痛恨惟食麥至絕鹽味

禮稱親未葬喪服不除焉食麥斷鹽味悲哉四十年

寇祖訓

父母亡雖久猶於所處設幃帳嚴
奉如平生 曹孟德銅雀臺遺令

必如寇祖訓始不死其親孟德空遺令不乎真罪人

王崇

以孝感風電至崇田便止禾麥
並無損落及越崇田風電如初

風電忽止處禾麥獨依然料得天公意知為孝子田

房景伯

為清河守呂不孝者觀已事母其
人愧求去不許曰雖顏慙心未改

親見房太守殷勤奉旨甘那能不心愧豈止是顏慙

元子華

母夜飲還大吐人謂中毒子
華掬吐盡噉之母心乃安

未必食有毒人言疑似間不辭噉母吐圖得母心寬

劉獻之

誨學者曰百行殊途要以孝為首
儻不能然雖下帷躡屨竟何益乎

百行孝為首諸人儻未知下帷空自苦躡屨竟何裨

崔道固

母賤諸兄逼其母持炙致賓前道
固驚接謂客曰老親自執劬勞

是誰迫我母持炙致諸賓驚起自接取云賓此老親

于仲文

九歲周太祖問曰聞兒好讀書書有何事對曰資父事君忠孝而已

讀書無見處與不讀書同勿謂兒年小能知孝與忠

李賢

從師學或譏其業不進答曰豈能領徒授業至於忠孝之道實銘于心

誰知學進處不在好為師好把銘心底分明說與伊

李崇

以父勲封侯泣下曰無勲於國幼小封侯當報主恩恐不得終於孝養

封侯何爾泣兒幼乃無勲恐莫終親養應將報主恩

李士謙

少孤未嘗飲酒肉絕口殺害之
言陸襄親沒終身不敢言殺害

殺生非孝也人未必云然絕口殺害語君看自少年

文中子

汾水之曲有先人之敝廬在有田
可以具饌弼彈琴著書不願仕也

先人舊所理汾曲有田廬何意求聞達彈琴自著書

房玄齡

以孝稱父彥謙謂曰人皆因祿富
我獨以官貧所遺子孫惟清白耳

人皆因祿富我獨以官貧佩父清白訓為唐第一人

陳叔達

御前賜蒲萄不食曰臣母病渴願歸以遺母帝喟然曰卿有母遺乎

蒲萄歸遺母所嗜固應思卿乃有母遺誰知此語悲

韋陸

韋承慶被後母打弟嗣立解衣求代陸景融見兄象先被杖輒自楚悟母

不惜以身諫惟愁失母慈景融常自楚嗣立每求答

狄仁傑

求代鄭崇質使絕域以鄭母老疾
宗元願以柳易播曰夢得親在堂

狄請使絕域柳甘易播州為憐劉母在深恐鄭親憂

崔元暉

至孝母戒以從官有人來云貧乏
是好消息若聞富足是惡消息

若為從官好不異在家貧忍以惡消息而令戚我親

李迴秀

母氏庶賤妻崔氏嘗詈媵婢
母聞不樂迴秀即出其妻

生我者為母無緣貴賤分不思罵婢語何可使親聞

韋虛心

父維為郎時蒔柳于庭及
虛心居郎省對之輒斂容

父居郎省日蒔柳向庭中對柳如對父那能不斂容

歐陽通

居喪詔奪哀入朝徒跣及門
夜直藉藁以寢還家輒號慟

夜直藉藁寢入朝徒跣行雖知迫明詔可惜欠陳情

劉禕之

相王府司馬帝謂曰卿家忠孝朕
子賴以師矩冀蓬在麻不扶自直

卿家著忠孝朕子賴師模蓬在麻中直多應不待扶

韋景駿

有母子相訟者景駿曰余少不天
常自痛極爾幸有親而忘孝耶

長抱罔極痛嗟余少不天汝今幸有母不省汝胡然

張九齡

至孝居父喪哀毀庭中木連理居
母喪尤不勝哀有紫芝生坐側

連理庭中木叢生坐側紫芝未嘗聞孝感一一有茲奇

顏真卿

以孝稱祿山反獨真卿城守帝曰
朕不識真卿何如人所為乃若此

祇是見忠節何曾省孝誠唐宗休歎息猶未識真卿

韓思復

封長山縣伯明皇親題其
墓曰有唐忠孝韓長山墓

向來曹孟德魯擬表征西那得忠孝字金書作墓題

崔縱

以母事其父嬖妾妾剛酷雖縱顯
官而數笞詬縱率妻子承色不懈

直以母事妾祇云父所安可憐遭楚毒加意好承顏

崔沔

母亡受弔廬前賓客不至柩室曰平生非至親不入謁豈以存亡廢禮

憶昨升堂拜何曾有雜賓事亡忍廢禮不復問疎親

李乂

兄弟孝謹至甚又俱以文章自名兄弟同為一集號李氏華萼集

俱以文章顯無慙孝謹稱弟兄同一集華萼著嘉名

裴子餘

謚曰孝張說歎曰此謚可無愧矣

直以孝為謚真無愧此心可憐張說歎知得子餘深

李勉

江西觀察使部人有為父病厭盛者
書勉姓名埋之勉曰是孝子也不誅

不誅人厭已而恕子祈親賢矣李觀察今無復此人

陽城

語諸生曰學者所以學為忠孝諸生
有不歸省者乎明日請歸者二十人

學者學為孝諸生務講明謁歸二十輩母乃為陽城

段秀實

號孝童朱泚為逆以秀實失兵必
恨憤遣騎迎秀實奪笏擊泚以死

意其失兵久怏怏必吾從奪笏直前擊那知是孝童

李晟

少孤事母孝後平朱泚
復京師贊曰身佩安危

箇是一孤兒曾聞事母時身能幾許大却佩國安危

元德秀

字紫芝家貧舉進士不忍
去母左右自負母入京師

進士能母舉偏親可忍離紫芝亦良苦負母入京師

穆寧

戒子曰孝子事親養志為大吾志直道而已苟枉道三牲五鼎非吾樂也

儻非親所樂至枉道而行雖以三牲養難辭不孝名

侯程

廬墓哭泣無節侯知道七年程俱羅三年不止李華作二李贊

三年天下共胡爾獨終身無處著深痛何心求過人

李唐

見肅宗抱幼女謂唐曰我念之卿勿怪也唐曰上皇思見陛下計亦如此

我念卿母怪難拚膝上兒好將南內意說與肅宗知

韓滉

當列戟以不欲壞父時第門而止不許增堂廡曰先君容焉吾奉之而已

謹勿第門壞那容堂廡增父猶足乎此我顧莫之承

賈直言

父道冲坐事賜鵠直言給取鵠代飲迷而路明日毒潰足出久乃蘇

幾曾聞飲鵠有不隕其身那得獨全活天應知代親

李景讓

蔣仲酌酒曰有孝於家忠於國者
飲此景讓起卒爵仲曰無宜於公

既爾家能孝還於國盡忠誰宜舉斯爵知是莫如公

韓愈

答元稹書甄逢能顯其父俱當得書
董生行云刺史不能薦天子不聞名

未有子之孝而公不用情大書甄濟傳更作董生行

柳宗元

書先友於父碑陰皆當世聞人
中說載隋唐名臣或云福時所集

乃翁定奇士先友盡斯人福時知己故儀曹意轉新

欽定四庫全書

江湖小集
卷九十五

四

甄逢

以濟父名不在國史欲詣京師自言
元稹為移書韓愈又表滋表贈濟官

史書良為植褒詔却因表足使濟不朽何堪逢自言

董召南

讀書躬耕以養父母韓愈董生行
云爵祿不及門惟有吏來徵租錢

躬稼復樵漁養親還讀書不聞官賜帛惟見吏催租

李興

有至行柳子厚為作孝門銘曰引及
自向殘敗肌形羞饒奉進憂勞孝誠

割股如為孝還應載聖經莫明柳子意因甚取殘形

何蕃

事父母孝學太學歲一歸父母不許
二歲亦不許凡五歲慨然揖諸生去

五載莫歸省雙親誰問安固云親有命不謂我何顏

鄭潛曜

母疾亟為書丐以身代母火書
而神許二字獨不化翌日母愈

願以身代母書焚上徹天若非神許我未必字依然

裴敬彝

欽定四庫全書

江湖小集
卷九十五

母病醫許仁則變不能
乘敬彝自為輿往迎

親命懸醫手敢將親命輕為輿不辭往重母故身迎

張志寬

為里正忽詣縣稱母疾求歸曰
母有疾志寬輒病令馳驗如言

何忽省母病每因親疾知可憐張里正尚得令君疑

趙隱

為相退朝侍養如布衣嘗侍母觀御
宴隱率百官拜恩于庭回班候起居

至今說花縣當日奉潘輿未必若趙母回班候起居

路隋

父泌陷虜隋尚嬰孺及長日夜號泣
母告以其貌酷類父終身不引鏡

兒貌酷類父母知兒不知可堪引鏡照正復益兒悲

李納

宰相楊收欲市納兄舍以廣第納
叱曰先人舊廬為權貴優笑地耶

先人敝廬在觸目百悲辛忍作優笑地圖娛權貴人

許孝謹

甫三歲母病不飲乳有憂色或
以珍餌悅之不食還以進母

既不忍飲乳還能知進親何曾自人教端是出天真

柳玼

戒子曰名門子孫稍有纖瑕十手爭
指生雖苟祿死何面目見祖先地下

名父難為子纖瑕即辱身直須留面目他日見先人

韋溫

疾病召親屬誦父綬詩在室愧屋
漏因泣曰今知汝身不負斯誠矣

常恐愧屋漏追懷在室詩可憐忍死誦不負乃今知

林欝

為福唐尉棄官侍母疾廬墓降甘露
詔立雙闕又表其廬時號闕下林家

七閩獨蒲郡雙闕鬱相望豈識林孝子曾來尉福唐

右賢者之孝二百四十首

釋迦

欲入涅槃遣弟子昇天報母至從
棺湧出為說母子恩情今日離別

入般涅槃際拳拳報母知從棺更湧出為母說分離

老子

送孔子曰為人
子者無以有已

子之於父母母以有其身老子虛玄祖諄諄此語人

孝悌王

有真人下降兗州孝子蘭公之家曰吾居斗中為孝悌王

七星明歷歷萬古仰煌煌誰識斗宮內中居孝悌王

目連

拔母生天故世人以七月十五日蘭孟會

能將身入地拔取母生天歲歲蘭孟會今猶說目連

許真君

鄉舉孝廉後得仙蘭公云
傳孝道之宗為衆仙之長

鄉以孝廉舉仙為孝道宗謂予言不信君請問蘭公

吳真君

年七歲夏月伏身父母牀下
不驅蚊曰恐去已而噬親也

何事不驅蚊癰然牀下身傷膚非所懼所懼去傷親

六祖

新州人常賣薪養
母後傳五祖衣鉢

新州在何處有箇養親人一旦成佛去那知昔賣薪

睦州

禪家呼為檐板漢每閉
門自織蒲鞋以養母

捨俗還將母禪關晦迹深其呼檐板漢誰識織蒲心

蘇仙公

得仙道白日上昇留一空櫃
與母曰若有所需敲櫃即得

世傳蘇氏子白日去登仙念母空留櫃敲時即得錢

寒山子

每見人家烹宰羊豕
即曰煮你爺煮你娘

鍋裏爺娘語寒山太猛生不妨時著眼直是得人驚

右仙佛之孝十首

辟司徒妻

齊師敗曰君免乎銳司徒免乎
曰苟吾君與吾父免可若何

君父今安在諄諄免矣乎可憐齊女子不問辟司徒

雍姬

謂其母曰父與夫孰親其
母曰父一而已胡可比也

可憐姬告母父孰與夫親能置此一問未為愚婦人

欽定四庫全書

江清小集
卷九十五

五

衛女

父母終思歸寧而不得
瑟彼泉水亦流于淇

歸寧不可得何以寫吾憂不似肥泉水悠悠淇上流

北宮女

至老不嫁以養父母趙后問齊使
曰此女不朝何以王齊國子萬民

妾身期不嫁至老養雙親何意趙威后殷勤問使人

秋胡子妻

薄其夫與道旁桑婦金不以奉
母曰妾不忍見不孝不義之人

妾面羞君面君心異妾心那能不念母却遺別人金

趙津吏女

簡子欲殺其父女乞以身代簡子賢之欲以為夫人辭以親在

儻得代父死誠以愛妾身不圖君聘妾向道有嚴親

如姬

公子無忌為姬報父仇如姬之欲為公子死無所辭

底事能令妾為君死不辭不思君遣客報妾父讎時

緹縈

父淳于公有罪當刑縈上書乞沒為官婢贖父罪文帝悲憐之詔除肉刑

仁矣文皇詔悲哉少女書至今民受賜非但沽淳于

陳孝婦

其夫遠戍屬曰吾若不歸汝善養吾母夫死戍所竟不嫁篤于養姑

妾昔與夫別夫曾共妾言忍能幸夫死不復顧姑存

東海孝婦

事姑甚孝為姑女誣告殺姑獄具竟論殺郡中枯旱三年

如何殺一婦能致旱三年孝婦無知者知之惟老天

曹娥

父時為巫溺死不得屍娥亦自沉縣
為立碑蔡邕題八字謂絕妙好辭

上虞一巫女名乃至今垂端的由純孝非專在好辭

梁夫人嫗

訟父竦冤詔改殯恭懷后追
封竦褒親愍侯仍徵還嫗母

能返母萬里還榮父九原可憐帝有母亦自待人言

孔融女

七歲父先為曹操所殺女臨刑曰
若死者有知得見父母豈非至願

不憂身即死惟恐死無知儻得從父母寧非我所期

宣文君

父宋躬傳以周官曰汝可受之
宋氏後傳授諸生號宣文君

難把父書讀祇因手澤存遺言汝可受忍使世無聞

宛陵女子

母夜為猛獸所取女攀母持獸
行數十里獸毛盡落置其母去

異哉一女子獨抱母啼號非但脫虎口還能落獸毛

盧元禮妻

元禮妻事姑以孝聞
詔號曰貞孝女宗

貞孝諡已美何堪復女宗一朝下明詔千載被流風

木蘭

古樂府云阿爺無大兒木蘭無
長兄願馳千里馬從此替爺征

謹勿悲生女均之有至情縈能贖父罪蘭亦替爺征

鄭義宗妻

盜夜劫其家冒及立姑側
為賊棹捶幾死竟不去

抵死侍姑側寧知有妾身若懷白刃顧尚得謂之人

李孝女

安祿山亂被劫徙它州聞父亡從
間道奔喪既知父已葬廬墓終身

奔喪脫賊手廬墓至終身此大丈夫事誰云一婦人

崔氏婦

唐氏事姑孝姑病召長幼言吾無
以報婦但願婦子孫皆若婦孝

姑今病且死頗愧婦恩深但願婦有子皆婦婦用心

右婦女之孝二十首

東夷大連少連

孔子曰大連少連善
居喪東夷之子也

大連少連者夫子筆之書誰若東夷子而於喪善居

若鞮單于

匈奴謂孝曰若鞮稱若鞮單于
王莽改匈奴單于為恭奴單于

漢語雜胡語堪嗤莽太愚安知若鞮字已是孝單于

休屠王子金日磾

降漢牧馬甘泉宮見母
像泣拜後受遺詔輔政

牧馬一胡兒如何却受遺多因漢宮裏泣拜盡闕氏

西羌東吾

以父滇吾降漢乃入
居塞內謹愿自守

循循祇自守何獨此羌然直以父在漢忍將身犯邊

號吾

章和二年將其母及種
人八百戶自塞外來降

如何降塞下不復戀羌中既是能將母還應知向風

百濟王扶餘義慈

事親孝與兄弟友
時號東海魯子

夷方雖爾異天性本然同自昔聞曾子如今在海東

扶桑國

親喪七日不食設座
為神像朝夕拜奠

不食至七日能將禮自居既然嚴像設亦復奠朝晡

吐谷渾葉延

父為羌所刺葉延縛草為人
射之母曰賊已屠膾矣何益

父讎已屠膾射草復何為豈不念無益其如罔極悲

回紇

郭子儀單騎見虜傳呼曰令
公來回紇驚拜曰果吾父也

瞥爾驚吾父同然拜令公遙知恩義重恰似與真同

沙陀阿跌光進

有至性居母喪
三年不歸寢

三年不歸寢至性切於親不信沙陀種還生如此人

右夷狄之孝十首

烏

磬磬林烏
反哺其母

靈鳥噪何許反哺向中林人可不如鳥而無愛母心

鶴

鳴鶴在陰
其子和之

好是鶴鳴陰居然子和聲休云氣所感自是物之情

燕雀

子母共處於一屋
之下相哺相樂也

共母一屋下寧知屋欲然不須譏寡知相哺政堪憐

虎狼

虎狼仁也父子相親何謂不仁仁之於父子也

虎狼不仁也何乃謂之仁仁之於父子父子亦相親

猿

蜀鄧芝見猿抱子樹上引努射中其母猿子為拔箭以木葉塞瘡

不忍身逃箭知為母塞瘡人心有如此獸面本何常

犬

唐齊瓊家有大隱肉喉間出哺病母於顏垣瓊收養之瓊死犬亦不食而斃

食肉隱兩頰飼母向顏垣終感主養母能將死報恩

羊羔

唐屠者王甲將剖一母羊忽失其刀
尋覓次蹴起羊羔見所失刀藏腹下

已分机上肉誰藏腹下刀安知羊不死乃復自羊羔

豺獾

下至禽獸豺獾有祭
人而不如豺獾乎

曾聞豺祭獸還見獾陳魚人苟不知祭能如豺獾乎

蛇

漢竇武母產武並產一蛇後母葬有大
蛇出榛莽以頭擊柩流血有哀泣之容

似有人傳計來從榛莽中叩頭至流血垂泣有哀容


青蚨

水蟲子母
不相離

子母不相離何心辨搗蚨忍能利銅臭不枉喚青蚨

右禽獸昆蟲之孝十首

善乎誠齋先生之言曰人而禽蟲如焉非甚也人而
不禽蟲如焉非甚乎伊欲上詣聖賢下免禽蟲奚為
而可曰學同曰孝書之坐右日以自省



江湖小集卷九十五